

Sommerfest – Babbelfest

Uffs Flerschemer Sommerfest giehsde hie, denkst onn nix Beeses, triffst ooner unn oo unn noch oo unn noch ooner unn schunn isses bassierd: Ess werdd e rischdisch Babbelfest!

Ei gude ihr Leit. No, wie isses bei dere Hitz?

Zwaamol die Nummer Oons unn zwaa Leichtsinn. Prost zesomme.

Gugge emol wie die doorum lääfd.

Sebbel? Sebbel? Du higgelsd joo, was issen los?

Schee Musik mache die.

Wo issen doi Fraa?

Ei disch habb isch joo schunn long nimmi geseh, drinksde ooner mett?

Mensch, wasse Hitz.

Was hodden der fern Hut uff!

Kumm mol her, moi Mädche, loss disch emol drigge.

Heiner, erzähl emol enn Witz.

Was mächsden du doo, isch denk, du bist in Urlaub?

Was drinksden? Isch gebb ooner aus!

Sabine, doin Monn iss doohinne.

Mächt die Kameradschaft widder mol enn Ausfluuch?

Dem Fritz soi Mudder iss gestorwe.

Naa, isch drink kooner mieh, sunnst wernn isch voll.

Heern Se mol, wie issen dess mett dere Dachklommerung?

Mensch, dess werdd joo alls wärmer hier, isch schwitz wie verrickd.

Wer stummt misch? Ach, du bists, gude!

Hosden nitt geseh, doin Monn? – der war ewe noch doo.

Eier Dochder iss in Amerika? – wie schee!

Isch bin geloffe, isch kann ebbes drinke.

Wo issen hier die Toilett?

Warsde unner de Brigg, beim Open Air?

Du host derr e nei Audo kaaft, wars alde kaputt?

Was, du brauchst e nei Knie?

Was iss de Henri su ald wormn! Guggder den emol oo!

Dess Sommerfest iss e rischdisch Babbelfest! Unn weilsde su geesche Elf genuch gedrunke unn noch mieh gebabbeld host hälsde disch onn de Fraa fest unn mächsde disch hoom, awwer kimmsd kaum die Trebb onn de Unnerfiehruung ennunner unn driwwe widder enuff, unn wenn de endlich dehoom bist, seesde als ersdes: Fraa, isch gieh in de Keller unn holl e schee Fläschje Woi eruff.

Nix gibt's.

Was iss?

Nix gibt's du kimmst doch gar nimmi die Kellertrebb enunner du host genuch ess longt moonsde isch soll disch ins Bett traache mett dem dollen Kobb den de host mächsde moie de gonse Daach doorum debei misse merr um Zwölf uffen Gebortsdaach drink enn Schluck Wasser unn mach dassde in die Fall kimmst isch habb derr de gonse Owend gesaad ...

Ja, ja, dess Sommerfest iss halt e rischdisch Babbelfest.

Eiern Honnes